

KATIKA NYUMBA YA MFINYANZI

Kutoka Kuvunjika Hadi Kusudi

Andiko Kuu

Yeremia 18:1-6

*"Ondoka ushuke nyumbani kwa mfinyanzi,
nami nitakujulisha maneno yangu huko."
(Yeremia 18:2)*

Utangulizi

Ni jambo la kushangaza kwamba Mungu hakumwambia Yeremia aende Hekaluni, mlimani, au mahali pa maono. Badala yake alimwambia:

"Shuka nyumbani kwa mfinyanzi, nami nitakujulisha maneno yangu huko."

Hii inatufundisha kwamba Mungu anaweza kuzungumza nasi kupitia mambo ya kawaida ya maisha.

Yeremia alipofika nyumbani kwa mfinyanzi, alimwona mfinyanzi akifanya kazi kwa udongo kwenye gurudumu. Alipokuwa akitazama, chombo kiliharibika mikononi mwa mfinyanzi. Lakini badala ya kukitupa, mfinyanzi alikifinyanga tena na kukifanya chombo kingine.

Hii ndiyo picha ya jinsi Mungu anavyofanya kazi katika maisha yetu.

Wengi wetu tumepitia nyakati za kuvunjika, maumivu, kushindwa, kukatishwa tamaa na kuchanganyikiwa. Lakini habari njema ni kwamba Mungu ni mtaalamu wa kubadilisha vyombo vilivyovunjika kuwa vyombo vya heshima.

1. Mungu Huona Uwezo Ambapo Wengine Huona Matatizo

Watu wanapoangalia udongo wanaona uchafu.

Lakini mfinyanzi anapoangalia udongo anaona chombo.

Watu walipomtazama Daudi waliona
mchungaji mdogo.

Mungu aliona mfalme.

Watu walipomtazama Gideoni waliona mtu
mwenye hofu.

Mungu aliona shujaa mkuu.

Watu walipomtazama Petro waliona mvuvi
wa samaki.

Yesu aliona mhubiri ambaye angewavuta
maelfu kwa Kristo.

Somo

Watu wanaweza kukuangalia kwa hali yako
ya sasa.

Lakini Mungu anakuangalia kwa kusudi lako
la baadaye.

Watu wanaona udhaifu wako.

Mungu anaona uwezo wako.

Watu wanaona makosa yako.

Mungu anaona hatima yako.

Usiruhusu hali yako ya sasa iamue thamani yako.

Mfinyanzi anajua kile anachokiumba.

Mfano: Almasi Kwenye Uchafu

Kulikuwa na mkulima aliyepata jiwe shambani mwake. Kwa miaka mingi alifikiri ni jiwe la kawaida na akaliweka nje ya nyumba yake.

Siku moja mtaalamu alipoliona, aligundua kwamba lile halikuwa jiwe la kawaida bali almasi yenye thamani kubwa.

Kile ambacho wengine waliona kuwa cha kawaida kilikuwa na thamani kubwa sana.

Vivyo hivyo watu wengi wamepuuzwa, kudharauliwa na kusahaulika.

Lakini Mungu anaona thamani iliyofichika ndani yao.

Huenda watu hawakuoni wa maana, lakini Mfinyanzi anaona thamani yako.

2. Mungu Hutumia Shinikizo Kututengeneza

Udongo hauwezi kuwa chombo bila kufinyangwa.

Mfinyanzi huubonyeza, huuvuta, na kuupa umbo.

Vivyo hivyo Mungu hutumia shinikizo kutujenga.

Hakuna anayependa majaribu au changamoto.

Lakini mara nyingi shinikizo huzalisha ukuaji.

Warumi 5:3-4

"Dhiki huleta saburi; na saburi huleta uthabiti wa tabia; na uthabiti wa tabia huleta tumaini."

Baadhi ya watumishi wakuu wa Mungu walitengenezwa kupitia nyakati ngumu.

- Yusufu alitengenezwa gerezani.
- Daudi alitengenezwa jangwani.
- Paulo alitengenezwa kupitia mateso.

Usidharau shinikizo unalopitia.

Mungu anakutengeneza.

3. Mungu Hatupi Vyombo Vilivyovunjika

Yeremia 18:4

"Na chombo alichokuwa akikifanya kwa udongo kiliharibika mkononi mwa mfinyanzi; basi akakifanya tena kuwa chombo kingine."

Angalia jambo hili muhimu.

Mfinyanzi hakutupa udongo.

Aliufinyanga tena.

Hii ndiyo picha nzuri ya neema ya Mungu.

Watu wengi hufikiri:

- Nimefanya makosa mengi sana.
- Mungu hawezi kunitumia tena.

- Nimeharibu maisha yangu.

Lakini Mungu anasema tofauti.

Musa alikosea.

Daudi alikosea.

Petro alimkana Yesu.

Lakini Mungu aliwarejesha na kuwatumia tena kwa utukufu wake.

Kushindwa kwako si mwisho wa hadithi yako.

Mungu bado anaweza kukutengeneza upya.

Kielelezo: Penseli

Mtengezaji wa penseli aliambia penseli mambo matano kabla hajaipeleka duniani:

1. Utafanya mambo makubwa.
2. Lazima ukubali kuongozwa na mkono wa mtu mwingine.
3. Utapitia uchongaji wenye maumivu.
4. Makosa yako yanaweza kusahihishwa.

5. Kilicho muhimu zaidi ni kilicho ndani yako.

Ndivyo ilivyo kwa Mkristo.

Mungu anatuongoza.

Mungu anatunoa.

Mungu anatumia.

Mungu anatumia.

Na kilicho muhimu zaidi ni kile ambacho Mungu ameweka ndani yetu.

4. Mungu Anafanya Kazi Hata Tusipoona

Udongo ukiwa mikononi mwa mfinyanzi haujui kinachoendelea.

Unahisi tu shinikizo.

Lakini mfinyanzi anaona chombo kilichokamilika.

Mara nyingi sisi tunaona shida ya leo.

Lakini Mungu anaona ushindi wa kesho.

Isaya 55:8-9

"Maana mawazo yangu si mawazo yenu, wala njia zenu si njia zangu."

Mwamini Mungu hata kama huelewi mchakato.

Imani ni kuamini mkono wa Mungu hata pale ambapo huoni mpango Wake.

5. Mungu Anataka Vyombo Vinavyobeba Utukufu Wake

Kusudi la chombo si kujisifu.

Kusudi la chombo ni kutumika.

Mungu hana shauku tu ya kutufanya tufanikiwe.

Anataka tuwe wenye manufaa katika Ufalme Wake.

2 Timotheo 2:21

*"Atakuwa chombo cha heshima,
kilichotakaswa na kufaa kwa matumizi ya
Bwana."*

Swali si:

"Nimepata nini maishani?"

Swali ni:

**"Mungu anaweza kunitumia kwa kiwango
gani?"**

Lengo kuu la maisha yetu ni kumtukuza
Mungu.

Hitimisho

Katika nyumba ya mfinyanzi, Yereimia
alijifunza kwamba:

- Mungu anaona thamani ndani yetu.
- Mungu hutumia shinikizo kututengeneza.
- Mungu hurejesha waliovunjika.
- Mungu anafanya kazi hata tusipoona.

- Mungu anataka kututumia kwa utukufu Wake.

Leo huenda unajihisi kama udongo kwenye gurudumu.

Huenda unapitia maumivu.

Huenda umevunjika.

Huenda huoni mwelekeo wa maisha yako.

Lakini kumbuka:

Mfinyanzi bado anafanya kazi.

Usikate tamaa wakati Mungu bado anakutengeneza.

Usiondoke mikononi Mwake wakati bado anakufinyanga.

Chombo hakikamiliki mpaka Mfinyanzi analize kazi yake.

Maombi

Baba wa Mbinguni, nakushukuru kwa kuwa Wewe ni Mfinyanzi Mkuu. Leo naweka maisha yangu mikononi Mwako. Nifinyange kulingana na mapenzi Yako. Ondoa kila kitu kisichokupendeza ndani yangu. Rejesha maeneo yote yaliyovunjika na unifanye kuwa chombo cha heshima kwa matumizi Yako. Nipe neema ya kuamini mchakato Wako na kukaa mikononi Mwako mpaka ukamilishe kazi Yako ndani yangu. Katika jina la Yesu Kristo, Amina.

Matamko ya Kinabii

1. Ninatangaza kwamba niko mikononi mwa Mfinyanzi Mkuu.
2. Mungu ananitengeneza kwa ajili ya kusudi lake kuu.
3. Kila eneo lililovunjika katika maisha yangu litarejeshwa.
4. Kushindwa kwangu hakutaharibu hatima yangu.
5. Kila shinikizo ninachopitia kinanijenga kwa utukufu mkubwa zaidi.
6. Neema ya Mungu itanitoshia katika kila msimu wa maisha yangu.

7. Nitakuwa chombo cha heshima katika Ufalme wa Mungu.
8. Kila kuchelewa kutageuka kuwa ushuhuda.
9. Nitatimiza kusudi la Mungu katika kizazi changu.
10. Kazi njema ambayo Mungu ameanza ndani yangu ataikamilisha katika jina la Yesu Kristo. Amina.